

# SOLENI DADE SANTÍSSIMA TRINDADE – TINAN A

## Tema

Solenidade ne'ebé ohin ita selebra la'ós konvite ida atu desifra/interpreta mistériu ne'ebé haksumik iha “Maromak ida ema na'in tolu” nia kotuk; maibé konvite ida atu kontempla Maromak ne'ebé domin, Maromak ne'ebé família, Maromak ne'ebé comunidade no hakiak ema sira atu komunga iha mistériu domin ida-ne'e.

Iha *leitura dahuluk*, Maromak komuñau no aliansa nian, hakarak estabese ligasaun familiár ho ema, apresenta nia An: Nia laran-di'ak no laran-sadia, neineik atu hirus no riku iha mizerikórdia.

Iha *leitura daruak*, Paulo espresa – liuhusi fórmula litúrjika “Na'i Jezús Kristu nia grasa, Aman Maromak nia domin, hamutuk ho Espíritu Santu hela ho imi” – realidade Maromak ida ne'ebé komuñau, família no hakarak dada ema sira ba dinámika domin nian.

Iha *Evanjellu*, João konvida ita atu kontempla Maromak ida ne'ebé soi domin boot ba ema sira, to'o haruka nia Oan-Mane mesak mai mundu; no Jezús, Oan ne'e, kumpre Aman nia planu, halo nia moris sai don total ida, to'o mate iha krús, atu ofereba ba ema sira vida definitiva. Iha istória kmook domin nian ne'e mak Maromak hatudu nia fuan boot oinsá.

## LEITURA I – Ex 34,4b-6.8-9

Ita-nia testu halo parte “tradisaun sira kona-ba aliansa Sinai nian” – konjuntu ida tradisaun sira ho orijen lahanesan, ne'ebé nia denominadór komún mak reflesaun kona-ba kompromisu ida (“berit” – “aliança”) ne'ebé Israel asume ho Jahwéh.

Testu lori ita ba rai-fuik maran Sinai nian, “iha foho nia oin” (kf. Ex 19,1). Iha testu bíbliku, ita la hetan indikasaun jeográfika suficiente atu identifika “foho aliansa nian”. “Sinai” la indika foho maibé, península ida ho forma triangulár, ho ± kilómetru 420 estensaun norte/súl, habelar entre tasi Mediterráneu no tasi Mean (iha sentidu norte/súl) no golfo Suez no golfo Áqaba (iha sentidu loromonu/lorosa'e). Península ne'e rai-fuik maran ida, ho fatuk no foho oioin ne'ebé atinje metru 2400 altura nian.

Tuir autór ruma, parese testu ne'e mak versaun primitiva jahwista kona-ba aliansa Sinai nian (sék. X mK); maibé, iha versaun finál Pentateuku nian (sék. V-IV mK), uza atu deskreve renovaun aliansa dahuluk nian, ne'ebé kotu tan Povu nia salan. Iha estadu atual Pentateuku nian, eskema mak tuirmai ne'e: Israel kesi an ho Jahwéh (kf. Ex 19); maibé, durante Moisés nia auzénsia, iha foho leten, Povu harii maromak falsu karau-oan ho osan-mean atu reprezenta Jahwéh – buat ne'ebé mandamentu aliansa nian bandu (kf. Ex 32,1-29); entaun, Moisés harohan daet ba Povu no Maromak hafoun aliansa ho Israel (kf. Ex 34,1-10).

## MENSAJEN

Depoizde hetan Maromak nia perdaun ba Povu, Moisés memesak sa'e ba Jahwéh nia prezensa. Nia lori ho nia fatuk belar foun rua atu bele hakerek mandamentu aliansa nian.

Iha-ne'e mak autór hatama teofania ("manifestasaun Maromak nian"). Maromak hakbesik Moisés "iha kalohan": kalohan, iha Testamentu Tuan, mak símbolu atu esprime Maromak nia prezensa ne'ebé mai hasoru ema; kalohan nia natureza mak haksumik no hatudu: atu dehan katak Maromak nia mistériu, subar no prezente, ema labele haree nia oin, maibé siik Ninia prezensa.

Teofania kontinua, ho Jahwéh raisk nia auto-aprezentasaun. Oinsá mak Maromak define nia An rasik?

Iha aprezentasaun ne'e, Maromak la temi ninia grandeza no kbiit; nia temi de'it "kualidade sira" ne'ebé halo Nia parseiru ideál iha "aliança": Jahwéh mak "Maromak laran-di'ak no laran-sadia, la hirus lalais no nakonu ho mizerikórda no fidelidade" (vers. 6). Israel simu konvite atu deskobre no kompromete an ho Maromak ne'ebé nafatin fiél ba Ninia kompromisu sira no solidáriu ho sira hotu ne'ebé presiza Nia.

Kestaun esensiál mak ne'e: Maromak hadomi nia Povu no tau matan ba nia ho laran-di'ak no ternura. Ninia laran-sadia la iha rohan, maski Povu ne'e sala oinsá, nia bele hakmatek, tanba Jahwéh, Maromak domin no mizerikórdia, garante Ninia fidelidade rohan-laek.

Moisés hatán ba aprezentasaun ne'e ho orasaun atu Jahwéh kontinua akompaña Povu iha dalan husi rai moris-atan nian ba rai liberdade nian; atu Jahwéh komprende Povu nia fuan toos no perdua nia salan sira; atu Jahwéh hafoun ninia eleisaun (vers. 9).

No Maromak, konfirma ninia auto-aprezentasaun (Maromak domin no laran-sadia nian, neineik atu hirus...), la perdua de'it Povu, maibé propoin ba nia renovasaun aliança nian (vers. 10).

## **LEITURA II – 2 Cor 13,11-13**

Surat Dahuluk ba Sarani sira iha Corinto (ne'ebé kritika membru balun komidade nian tan atitude ruma la kondís ho valór sarani sira) provoka reasaun boot no kampaña organizada atu hatuun Paulo. Paulo simu tiha informasaun, ba lalais kedas Corintono halo konfrontu violentu ho ninia funu-balu. Hafoin nia retira an ba Éfeso. Tito, Paulo nia belun, ema ne'ebé hatene halo negosiasaun no diplomata matenek, bá Corinto, atu tenta rekonsiliaaun.

Paulo, iha tempu ne'e ba Tróade. Iha ne'ebá mak nia hasoru fali Tito, ne'ebé fila fali husi Corinto. Notísia husi Tito fó korajen: nia konsege manán diferença no sarani sira Corinto nian hamutuk fali ho Paulo.

Ho konsolasaun, Paulo hakerek ho hakmatek surat atu defende (apolojia) nia apostoladu, no halo mós apelu ba kolekta ida atu tulun Kreda Jerusalém nian. Testu ne'e mak ita-nia Surat Daruak ba sarani sira iha Corinto. Ita iha tinan 56/57.

Testu ne'ebé propoin mai ita mak konkluzaaun Surat Daruak Paulo nian ba Corínto. Se ita kompara despedida ne'e ho ida Surat Dahuluk ba Corinto (kf. 1 Cor 16,19-24), nia badak liu, malirin no impesoál. La hatudu nu'udar surat "rekonsiliaaun" nian, maibé despedida entre parte rua ne'ebé sei iha tensaun iha relasaun.

### *MENSAJEN*

Paulo hahú hodi husik rekomendasaun jerál ruma ba membru sira komidade nian. Nia husu sira atu haksolok; atu buka to'oa ba perfeisaun; no atu, fó korajen ba malu iha relasaun fraterna sira, atu iha sentimentu hanesan no moris iha dame. Konsellu sira-ne'e nia kontestu mak difikuldade no tensaun sira ne'ebé komidade esperimenta.

Famozu iha surat ne'e mak fórmula finál saudasaun nian: "Na'i Jezús Kristu nia grasa, Aman Maromak nia domin hamutuk ho Espíritu Santu hela ho imi". Fórmula ne'e – trinitária momoos iha Testamentu Foun – iha orijen litúrjika. Provavelmente, ne'e mak fórmula sarani sira uza bainhira, iha kontestu selebrasaun eukarístika, sira troka malu saudasaun dame nian.

Fórmula ne'e konstitui konfisaun fiar nian iha Maromak trindade. Fórmula ne'e manifesta sarani sira nia fiar iha Maromak domin, katak "família", katak comunidade. Hodi utiliza fórmula ne'e, sarani sira rekoñese sira-nia an nu'udar membru "família Maromak nian"; no rekoñese mós katak sai "Maromak nia família" katak halo parte família ida mesak maun no biin-alin sira-nian. Tanba ne'e, sira simu bolun atu moris iha unidade: iha komuñãun ho Maromak no iha uniaun ho maun no biin-alin sira hotu.

## **EVANJELLU – Jo 3,16-18**

Ita-nia testu pertense ba sesaun introdutória Evanjellu dahaat nian (kf. Jo 1,19-3,36). Iha sesaun ne'e, autór apresenta Jezús no buka – liuhusi kontributu personajen oioin ne'ebé sei mosu iha nia testu – hateten sé mak Jezús.

Testu ne'ebé propoin mai ita halo parte konversa entre Jezús no "xefe judeu" sira-nian ida hanaran Nicodemos (kf. Jo 3,1). Nicodemos ba haree Jezús "iha kalan" (kf. Jo 3,2), karik tanba lakohi lakon ninia pozisaun iha estrutura relijioza judaika. Membru ida Sinédriu nian, Nicodemos sei mosu atu defende Jezús, iha farizeu sira nia oin (kf. Jo 7,48-52); nia mós prezente bainhira ema hatuun Jezús husi krús atu tau iha rate (kf. Jo 19,39).

Konversa entre Jezús no Nicodemos apresenta etapa eh faze tolu.

Ida dahuluk (kf. Jo 3,1-3), Nicodemos rekoñese Jezús nia autoridade, tanba Nia obra sira; maibé Jezús hatutan katak ne'e la to'o: buat esensial mak rekoñese Jezús nu'udar Aman nia Manu-Ain. Iha etapa daruak (kf. Jo 3,4-8), Jezús haklaken ba Nicodemos katak, atu komprende Ninia proposta, presiza "moris husi Maromak" no esplika katak moris foun ne'e mak moris iha "bee no Espíritu".

Iha etapa datoluk (kf. Jo 3,9-21), Jezús haktuir ba Nicodemos projetu salvaun Maromak nian: iniciativa ida Aman Maromak nian, ne'ebé sai realidade iha mundu no iha ema sira nia moris liuhusi Oan no sei konkretiza iha krús/ezaltasaun Jezús nian. Ita-nia testu pertense ba parte datoluk ne'e.

### *MENSAJEN*

Depoizde esplika ba Nicodemos katak ema tenke "foti sa'e aas" Mesias, hanesan "Moisés foti sa'e samea" iha rai-fuik (refere ba epizódriu ebreu sira iha rai-fuik, bainhira samea tata sira, hetan isin di'ak bainhira hateke ba samea riti nian ne'ebé Moisés harii – kf. Nm 21,8-9), atu "ema hotu ne'ebé fiar iha Nia hetan moris definitiva" (Jo 3,14-15), Jezús esplika oinsá krús tama iha Maromak nia projetu. Esplikasaun ne'e haktuir liuhusi pasu tolu...

Pasu dahuluk (vers. 16) refere ba signifikadu ikus krús nian. Mane ne'ebé sei foti iha krús mai iha mundu, hola isin iha ita-nia istória umana, asume ita-nia frajilidade, partilla ita-nia umanidade; no, nu'udar konsekuénsia ba Ninia luta hasoru forsa sira nakukun no mate nian ne'ebé halo ema sira sai atan, ema kaer Nia, tortura Nia no oho Nia iha krús. Krús mak hahalok ikus vida ida-nian, ne'ebé moris iha domin, saran an, entrega total.

Mane ne'e mak Maromak nia "Oan-Mane mesak". Espresaun ne'e fó hanoin "Isaac nia sakrifísiu" (kf. Gn 22,16): Maromak nia hahalok hanesan ho Abraão nian, ne'ebé iha kapasidade atu saran nia oan tan domin (iha Abraão, domin ba Maromak; iha Maromak, domin ba ema sira)... Tan ne'e, krús mak espresaun aas liu Maromak nia domin ba ema sira, hodi oferese salvasaun.

Sá loos Maromak nia objetivu hodi haruka Oan-Mane mesak atu hasoru ema sira? Atu liberta sira husi egoíзму, moris-atan, alienasaun, mate, no haraik sira moris rohan-laek. Ho Jezús – Oan-Mane mesak ne'ebé mate iha krús – ema sira aprende katak ita hetan vida definitiva hodi obedese ba Aman nia planu no hodi halo moris sai don ida ba ema sira, tan domin.

Iha pasu daruak (vers. 17) ita haree momoos Maromak nia intensaun. Hodi haruka Oan-Mane mesak mai mundu, Nia la iha intensaun negativa. Jezús mai mundu tanba Aman hadomi ema sira no hakarak salva sira. Mesias la mai ho misaun atu tesi lia, la mai mós atu esklui ema ruma husi salvasaun. Nia mai atu oferese salvasaun ba ema hotu, hanorin sira hadomi lahó sasukat no haraik ba sira Espíritu ne'ebé nakfilak sira ba Ema Foun.

Maromak la haruka nia Oan ba ema perfeitu no santu sira; nia haruka nia Oan atu hasoru ema maksalak sira, egoista sira, autosuficiente sira, atu apresenta ba sira proposta foun moris nian... Jezús nia domin – nune'e mós Espíritu ne'ebé Jezús haraik– mak nakfilak ema egoista, foti-an, autosuficiente sira-ne'e no hatama sira iha dinámika moris foun no nakonu nian.

Pasu datoluk (vers. 18) deskreve atitude rua ne'ebé ema bele foti, iha oferta salvasaun ne'ebé Jezús oferese nia oin: ema ne'ebé aseita Jezús nia proposta, adere ba Nia, simu Espíritu, moris iha domin no saran an, hili vida definitiva; maibé ema ne'ebé prefere kontinua sai atan ba egoíзму no autosufisiénsia, nia rasaik taka nia an ba salvasaun. Salvasaun eh kondensasaun, iha perspetiva ne'e, la'ós prémiu eh kastigu ida ne'ebé Maromak fó ba ema tanba ninia komportamentu di'ak eh aat; maibé rezultadu husi ema nia hilin livre, ba oferta inkondisionál salvasaun nian ne'ebé Maromak halo ba nia. Nune'e, responsabilidade ba vida definitiva eh ba mate rohan-laek la'ós Maormak nian, maibé ema rasik nian.

Tuir João nia perspetiva, la eziste julgamentu/tesi-lia ida iha futuru, iha tempu ikus, iha-ne'ebé Maromak tetu iha dasin ema nia salan sira, atu haree se Nia tenke salva eh kondena ema: tesi-lia ne'e hala'o ohin no iha-ne'e no depende ba atitude ne'ebé ema asume iha Jezús nia proposta nia oin.

Nu'udar rezumu: tanba hadomi umanidade, Maromak haruka nia Oan-Mane mesak mai mundu ho proposta ida salvasaun nian. Nia nunca dada fila ninia proposta ne'e; Nia kontinua oferese no hein resposta. Iha Maromak nia oferta nia oin, ema bele hili moris rohan-laek, eh hili atu la hetan salvasaun.